

第二章 陸小明篇 一節 約會

【三月四日 星期四】

依家係十二點二十分，我企係麥當勞等緊一個人。

回想起個零月前，我曾經係同一個位比同人個人放過飛機，希望悲劇唔會重現。

點解我地仲要好似原始人咁約實個時間然後準時到？問得好！因為依個就係我地今日約會既原因——我約左既人並無手提電話，而到今日佢終於決定加入現代人既大家庭，回到未來。

科技到底係乜野？科技係為我地帶來方便既用具，亦都係我地變得越黎越不可靠既理由。

你老豆老母既時代，約人係唔可以遲，因為果陣無手提電話，而係得大哥大依樣野；而大哥大又唔係個個都有，舉例黎講，好似依家既唉瘋咁普及係無可能。而我地依家有手提電話，所以遲到？wfc？撥個輪交代下咪得囉。

早到果個悶？唔緊要，你既時間唔會浪費，因為你仲有whatapps、line、facebook等等「社交網絡」令你隨時都可以搵個人打下牙骹講下事非，波斯膠同胡罔罔分左手咩？一早就應該要啦佢地！

你老豆老母既時代，你係需要用腦或者用筆去記住對方既電話號碼，到依家因為你有電話簿或聯絡人功能，你只需要輸入一次；你甚至連自己電話號碼都唔記得，要身邊既朋友話比你聽。

你老豆老母既時代，你會記得重要既人既生日。無錯，你係記唔晒所有人既生日，但咁就証明左你記得住既，係你心目中都有一定份量。若果你早十五二十年出世，你一定估唔到一句生日快樂可以好似今日咁廉價。

你老豆老母既時代，坐車係好悶，無野做；無whatapps、無電話粥、無歌聽。你可以選擇周圍望，又或者自己帶本書黎睇；亦因為你既選擇小左，你與車入面其他人互動既機會亦會增加。睇番今日香港人個個坐交通工具都要你避我又發現我避你眼光，真係好尷尬；難怪有人話到三十歲都要依賴交通工具真係好可憐。

你老豆老母既時代，你同你隔離既陳太同埋張師奶會好熟，同一層公屋入面既細路可以你去我屋企我去你屋企玩。到今日，個個細路都係屋企自己打機上高登；無錯，你可以同遠在天邊既人溝通，但係你忽略左係自己身邊既人——同樣既例子可以應用係同朋友食飯果陣唔傾計，但係whatapps同其他唔係到既朋友傾既各位港男港女，原來一齊食飯既意思，就真係只有「一齊食飯」，用舊啲既方式去表達就係搭枱。

咁你話，科技到底令人與人之間既距離拉近左定係拉開左？我唔知道。
我剩係知道，佢出現了。

「你依家先到既？」我問佢，我印像中桑妮似係果種早十五分鐘到既人。
「我地明明約十二點半，依家十二點廿三分咋喎。」一對一相處既情況可，桑妮都顯得無咁拘緊。

「我足足等左你三分鐘零廿六……廿七……廿八秒。」
「你唔開心唔滿意？」桑妮低聲問。

「開唔開心滿唔滿意睇等邊個姐，若果你既話……」
佢望實我，好期待我既答案。

「三分半鐘差唔多啦。」
「哼。」佢好似唔滿意我既答案，別過頭逕自走開。

我見狀梗係要追番上去，雖然我唔信等女人係男人既義務依類不平等條件，但係若果等三分半鐘就不滿的話，我未免太小器。

「咦，好似有人嬲喎。」
「我點會嬲你，只不過我累你等左三分鐘零廿八秒，我想行快啲爭取時間彌補姐。」桑妮幾時開始咁牙尖嘴利？一定係呀飯教壞左佢。

抑或我由一開始就唔了解佢？

「食乜？」我問。「求其啦。」佢答。
今次Hi Hi了，依個引起情侶間無數紛爭既對答竟然出現係我地之間。

類似既提材我好似探討過，所以唔再重覆。

「咁求其就美心。」「哦。」
好平淡既回應，完全聽唔到喜怒哀樂，要我估，令我不安，從而獲得主導權。

究竟桑妮係真係好天然咁回應我，定係扮豬食老虎，內裡係情場高手？
我唔知道，雖然依家既情況比gal game入面揀選擇面對既分歧支更多，我只知道若果我依一刻認真咁去諗佢既反應，我就輸左。

諗左一堆我自己都唔知自己想表達乜野既文字之後，我已經係美心前面。

好彩依家仲未十二點半，周圍學校仲未放lunch，否則陣間其他學校既學生排山倒海咁湧出黎既時候，軟雪糕都無得我地食。

「海南雞飯，飲可樂。你食乜？」「你食乜我食乜啦。」「咁乘二。」

咁和諧又咁有效率既點餐模式，真係令無數情侶妒忌至極，睇黎食飯依啲高危噏交區我可以安然渡過。

當我地拎完餐坐低果一刻，收銀已經被一大堆學生圍攻。

「係依個時候著住便服食飯真係唔多慣添。」

「你望下收銀到隔離校班人。」

桑妮遠望：「唔？」

「They stand, we sit, they lose, we win.」

「食飯啦winner.」

講開隔離學校，我地兩間學校其實係連體嬰黎，相信好多讀者既學校設計同我果間都一樣，自己既禮堂上面或下面疊住另一間學校既禮堂，並以此為旋轉軸，對稱咁起。而禮堂兩側都有樓梯連接兩個禮堂同兩邊操場。

而我地兩間校之間既關係都有啲微妙，類似係競爭對手既感覺，本身係應該好正面，但最近好似有轉壞跡像。

例如如琴日既四乘一百友校邀請賽，我地學校輸左（可能係因為代表之一既凌樂府失蹤，臨時拖個九唔搭八既人去參賽），隔離校啲人即刻串SevenSeven牙斬斬，爭啲打交。

當然啦，玩社團運動既只係小數人，係佢地先會有依種感覺；所以對我依啲回家社社員黎講，根本唔關我事。

點解無啦啦提起佢地學校？講起我就扯火喇。

「你食完未呀？」桑妮你食得咁快既！？」

「我家姐……」

第二章一節 約會 完結 待續

二季二章二節 跳躍

「點解要買部咁廢既機？」我手上面渣住兩部一模一樣既機。

無錯，桑妮決定買我依家用緊果部，一部幾年前既model。

「我邊有咁多錢㗎，而且用依部唔好咩？」Sony用Sony Ericson，怪雞。
我將部手機比番佢，然後話：「連上facebook都唔得既機，而且又無apps，係依個年代點生存到？」

「你咪又係好地地？」我天生異稟姐，大風小小就吹得走你啦，你邊到可以同我比較？

「咁你入左我電話先啦。」雖然我上一節呻左咁多，但係結果我都係唔記得自己Number，我低頭去搵自己number既同時。

「嗖——」我感受到一陣風。

「咦？」

【任務.....】

「我部電話呢？」桑妮手上面本身渣住既電話，消失不見。

【追回桑妮的電話】

原來Sony仲未摺到Nokia咁，一樣有人偷？

但係依家唔係諗依啲既時候，我即刻望向右面既人群，見到入面有個人零零舍舍跑緊。

你條仆街含家劇！

「你係到等我！」

你唔知好似情侶咁互sd msg，柯屎柯尿都向對方交代咁甜蜜既生活我嚮往左幾耐？

到等邊個會咁無聊，偷部跌左都無人會執既電話？

我打開地圖，鎖定左對方；距離其實唔遠，但係依到真係好多人。

係商場裡面追逐可以話係港產片既必然戲碼，係第二季開始果陣我都已經追過人一次，估唔到咁多又要再追。

係咪因為作者剩係識寫追逐戲？

我係人群中穿梭，終於見到佢車尾；條友跑得幾快下，唔會慢過凌氏兄弟。

從後面觀察，佢根本唔高，佢既移動速度與其身高並不相乎（雖然凌氏兄弟都係，令到依樣本身好出奇既野都好似唔再出奇）。

我追到黎每個商場都實有既中央廣場附近，我地依家身處係三樓，係玻璃欄外面既就係三層樓既落差。

依到路比較闊，人比較小，如果我開matrix一定追到！

「仆街你咪撚走！」我大喝，但係正如差佬叫啲賊咪走一樣，從來都無賊會停低舉高雙手同你講：「對唔住警察叔叔，我做錯左，以後都唔敢，請你帶我番差館接受法律既制裁啦。」，佢都係一樣彩我有味。

佢企定左係玻璃欄面前，佢究竟想點？

「屌！」見到佢下個動作我屌左出聲，佢竟然將部電話扔左落去下面！

你偷部電話番黎就係為左扔左佢？定係存心為左破壞我既美好情侶生活？

「我要肢解你條含家劇！」

我撲左上前，而佢就係我捉到佢既前一秒，跨左出去欄杆外面。

what the fuck？

我望落去，佢瞬間於地下既廣場出現，然後接過空中墮落緊既手機，然後望望我就繼續逃走。

能力者，一撚柒定係。

依個能力我好似見過，若果無估錯既，佢就係童黨一號。

點解你要咬住我唔放？明明你話唔想惹我，但係一次又一次咁得罪我！

一隻鷹忽然出現，悠然自得咁降落係玻璃欄杆之上。

隻鷹邊到黎？你都蠢尻，你會唔會問仔車啲問號箱邊到出現呀？

我好自然咁就跳左上欄杆之上，然後一躍而下。

「Nothing is ture, everything is permitted!」

我降落於花槽之中，唔好問點解花槽既抗震力點解咁勁！只要有鷹有白鴿，我係IFC上面跳落黎一樣無事！

攻擊力上升】

【對方已被震懾】

刺客信條既名言配合我跳落黎既動作特別有霸氣，連個賊都比我嚇疾左。
我右拳鐘埋佢，始終我落地果下雙方都有啲距離，衝得上去黎佢都震懾完。

佢及時反應得切向後跳，但點解唔用能力避開呢？

根據上次交戰既經驗所知，佢攻擊力本身已經唔高，再加埋手執電話既關係，令到佢難於反擊。
我一眼睇出依點所以繼續搶攻，但係佢以靈活既迴避一直同我拉鋸。

好！Angry bird！

我用憤怒鳥出左個兩粒星既拳，以依個速度中硬！
「唔係得你一個有能力……」

佢一眼睇穿，係我拳頭應該打中佢既一刻，佢瞬移至一步之後。
「嘎……點解……會唔中……」我既Angry bird只要出得好，從來都無打失過……

「再一次証明你好唔了解自己既定位，明明係一個咁實用既能力。」
「咩意思？」我係屬於唔睇說明書果類人。

「你既名號係觀察者，你既能力應該係視覺相關，而非攻擊類。」
無可能！Angry bird，咆哮之類既招式都係我既攻擊招式，但係眼前人竟然否認左？

「我唔知你頭先睇到乜野，但係實際上，你只係用視覺拆解眼前目標既弱點從而進攻。」
「如果我係你我就唔會企係到同我講解咁多喇！」唔理佢講既係真定假，我既攻擊力一定比佢強！

Angry bird！

【造成126點傷害】

依一個兩星拳佢避得好勉強，拎住電話既右肩中左招，依拳既傷害力足以將佢手中既電話打出黎。

Matrix！

我以兩倍既速度衝去接住個電話，如果Sony買既係Nokia我一定唔會執，話知佢跌爛地下
啲雲石又或者整穿地殼我都唔會執。

【攻擊力下降】

【防禦力下降】

【迴避力下降】

【命中率下降】

原來個電話真係會令到我能力下降，但係迴避力下降左佢都避到我咁多招，若果依家我扣

左命中同迴避，分分鐘會比人打番轉頭！

果然，佢一拳猛擊我右腹；佢無用能力追攻，所以其實出拳速度唔係特別快，我實避到！

【受到108點傷害】

點解會避唔到？我身體無回應到我大腦下達既指令！

童黨一號乘勝追擊，再補一腳！

扣左防既我唔可以食依一腳，於事我雙手交叉護腹，硬接依一招！

【受到112點傷害】

【能力值已恢復】

但係手中既電話跌左出黎，主導權又番番去佢手上。

能力值恢復既我再次使出Angry bird！

又一個兩星，但係佢依然係輕描淡寫咁輕鬆避開。

「點解我要講咁多？如果你知道自己既氣力得番幾多，你一定唔會咁問。」

「氣力？」咦？

肺入面瞬間抽乾，好辛苦！

「咳！咳！」我頭先短短兩分鐘之內由三樓上面跳落黎，開左兩次angry bird，仲有用matrix，就算係等級三既我都應付唔到！

相反童黨佢對能力既消耗拿捏得好準，佢好識係用能力或者食招之間作出取捨，所以佢仲好鬆容！

「繼續追我啦，我先行一步。」我竟然比個低等級過自己既人拉打。

「嘎……嘎……」我半跪係地上目送佢離開。

佢緩緩咁向商場另一角移動，但係無用到瞬間移動能力，點解佢唔一開始就瞬間移動去遠處呢？

商場外面既地圖用左紅色黎代表，睇黎任務期間唔可以離開商場。

好彩我仲有地圖能力，等我make a come back啦！

我抖完氣之後，往地圖入面金色既點進發。

到達既時候，只見電話已被遺下係一個好隱蔽既位置。

打開部電話，入面有一個編寫中既短訊。
「我任務已經完成，除此之外我無理由與你為敵。」

依次已經係第二次，上次佢都講過類似既野。
我繼續將短訊血下拉，係一堆空行之後出現最後一句。

「我地短時間內一定會再見。」
我都有依種預感，佢到底有咩企圖？抑或真係單純地為左做任務先一次又一次咁冒犯我？

* * *

「比番個電話你，無穿無爛。」
「估唔到依種古董電話都會有人偷，都係買條電話繩綁實好啲。」無錯喇，用番筒形狀電話既各位或者已經唔記得左，世界上係曾經有電話繩（又名聖誕樹）依樣野。

「話唔定個賊以為你收埋啲甜照呢。」
「岩岩先買部電話番黎，邊到影到啲！」
「即係你會影？」
「！」
桑妮留意到自己既失言，於事檸轉頭唔理我。

「乖，唔好嬲，最多我影番啲甜照比你睇！」我攬住佢肩頭講。
佢即刻推開我，然後話：「你啲甜照搵鬼睇咩！」

KO，危機解除。

「今晚食咩好？」
「你話事啦。」
「又我話事！」

一波未平一波又起，睇黎拍拖唔係咁容易！

二章一節 跳躍 已完 待續

二章二節 破裂

【三月五日 星期五 今日無特別事件】

「我起身了，今天天氣不錯呢^^」

「我都起左身喇啲卜卜>333333<」

我從來都唔知道短訊係可以咁好玩。

「待會學校見^^」

「好呀啲卜卜卜>333333<」

仆你個街個三制好似壞壞地添，遲啲換撚左部電話佢。

講起電話，童黨兩次同我碰面都係同電話有關，佢究竟有咩底細？依家佢在暗我在明，咁樣的話我好難做。

諗起雙府既提示，佢話見過跳躍者。咁樣的話一百米決賽既參賽者最有嫌疑。

關於參賽者名單，我知道要問邊個。

「光仔！」田徑部部長光管腳，出場率真係好穩定。

「乜野事？」唔知幾時開始我搵佢幫手就變左做一件好理所當然既事。

「無，所同你打聽下一個人先？」

光管腳諗一諗，然後再問：「又有麻煩？」

佢指既麻煩通常係指猩猩同呀飯之間既事，但係猩猩最近幾章都無出現過，大家都好清楚作者已經唔記得左依個角色。

「純粹想識個人姐……嘻嘻……」

雖然只係一瞬間，但係光管腳露出一個厭惡既眼神，然後話：「男定女？」

「男黎，但係我唔知佢係邊個。」

光管腳嘆左一口氣，然後話：「咁點幫你查呀……」

「據我所知佢有係前日陸運會丙組百米跑決賽參戰……名單上面有無邊個最近有啲怪？」

「唔……」光管腳沉思。

「無？」

「其實有，但係……」

「但係？」

「佢係田徑部既人，講起異變佢最近的確係有。」

「即係邊個？」唔好再賣關子得唔得。

「陸小明。」

邊個黎？

「無聽過？正常，佢本身係學校唔出名。」

你錯左，就算佢本身好出名，以我既毒燃性格我都多數唔會識。

「佢本身跑得唔快，但係勝在勤力，田徑部既活動、訓練佢一次都無缺席過。」

你地田徑部多囡囡咋？

「但係最近，佢跑步既成績快左好多，但係相對地亦都成日缺席田徑部活動。」

跑得快就梗係唔洗出席啦，你中左六合彩你仲會唔會番工丫？

「你有無聽緊？」

「有！梗係有！」仲一路聽一路係心入面吐槽添。

「你覺得點？」

「接佢放學囉，反正你作為部長都似要輔導下啲部員架啦？」

「好。」

* * * * *

「去左邊到玩呀廢柴。」小智問。

「關你Q事咩。」

「係咩，本身有野想同你開心SHARE下，睇黎唔洗。」

唔通同童黨有關？

「咩事黎？」

「關你Q事咩。」

「屌你老母！」

兩星ANGRY已發動！

小智係我個頭到貼左張野，然後忽然昏昏入睡.....

【進入睡眠狀態】

* * * * *

「嘩，你昏迷成個lunch time呀！」呀飯篤我條腰，我痕得制先醒左。

「咦.....點解我會訓左既？」

「你個頭貼住張野。」水牛並非與呀飯同時出現。

「下？咩野黎？」

我撕左張野落黎睇，小智頭先應該就係癡左依張野落我個頭到。

「上面寫左啲字喎。」

「柒頭。」水牛宣告死刑一般既語調。

「小智我屌你老母！」

我行埋去小智既座位。

「我應該同你講過，唔好屌我老母。」小智依然串柒柒。

「你依家凡人黎架咋，我洗唔洗買你怕？」

「咦，石同學同波仔咁friend架咩？」呀飯問。

「friend你老鼠！」我與小智齊聲道。

「.....我地班上面有依個人.....？」水牛低聲問。

小智見狀立即無視我，上前同水牛話：「龐同學你好，我叫William，平時係班上面好低調，最近因為打機既關係先同劉驚波條戇尻仔有兩句計傾。」

「你就戇尻！」

「我從來無見過你。」

「你可能唔記得姐，又或者咁岩見唔到。」

「唔會，咁岩見唔到既可能係零。」

睇黎水牛留意到小智存在既問題，但係呀飯就完全唔為意。

「你地嘈夠未？」係班房另一角，本身訓緊教既呀方開聲。

「游立方同學你好，我姓陳。」

「你邊位？依家打左鐘喇，番番去你既班房唔好係到阻住地球轉啦。」

「咦，連呀方都唔認得石同學？你地話晒都第二年同班喇喎。」呀飯道。

呀方望住呀飯，又望住小智。

佢同小智眼神較勁一番之後，乜都無表示到就繼續訓。

鐘聲響，下一秒任sir就入左黎班房：「Ace、劉驚波、范雪怡、石拓斯番埋位。」

連老任都唔覺得小智既存在有問題。

睇黎，察覺到小智有問題既，只有玩家。

放學時間。

呀方又好快咁走左，佢依排日日都係咁。
而我就係其他人問長問短之前離開左班房，去搵光管腳集合。

我係佢地班房門口外面等，好快就等到光仔。
猩猩同光仔一齊出現。

「你係到做乜？」猩猩問。
「我最近發現你個BEST FRIEND好MAN好有型，屎忽個CRUVE勁SHARP，想中途轉基姐。」我仲用手指了一了佢既心口。

「屌！」猩猩立即跳開，外型甚為誇張，依家我有性病咩？
依家得番我同光仔兩個。

「你玩到咁大，我以後點做人？」
「如果佢當你係兄弟，應該唔會周圍揚你既性癖既。」
「.....」

轉眼間，我地係F.2既樓層。
呀方同陸小明.....亦即係童黨一號並肩同行。

心底裡清楚呀方身份既我同光仔，已經明白小明異變既原因。
雖然我一早知道佢係童黨（精確黎講係先知道佢係童黨然後先知佢係小明），相反光仔應該仲未知道小明加入童黨一事。

呀方同小明亦都留意到我地，本身移動緊既佢地企左係原地，與我倆對望。
首先打破沉默既係光仔：「小明.....你.....」
「部長。」

而我就同毒撚方互相對望，以眼神較勁。

「小明，你跟我黎。」
「呀方，你跟我黎。」

* * * * *

係學校一角無人處。

「我同你唔同，我依家好多野做，如果無野既話唔好阻頭阻勢。」呀方望望手錶道。
「有咩做？作奸犯科？你要錯到咩地步先肯收手？」說得一向都係主角威能，睇下依招WORK唔WORK先。

如果可以，我真係唔想同呀方開打。

「錯？好似以前咁做條毒撚比人恥笑就叫做好？」
「咁代表好似你依家咁做個爛仔就叫做好？你依種非黑即白既邏輯可唔可以捨棄左佢？」

「做爛仔有咩唔好？有人比面，有收入，而且唔洗無所事事同比你睇唔起！」佢開始激動。
「我幾時有睇你唔起？」我好似講緊大話。

「係，我自知自己無龐毅斯咁叻，我只係一塊綠葉；但係作為花朵既你，竟然鄙視一直支持住你既綠葉，一直只可以仰望你既綠葉。」
「我從來都唔知自己竟然係一朵花，真係受寵若驚。」原來呀方佢係咁諗。

「本身唔係，但係自從年頭開始，你就爬到去同龐毅斯一樣既高度。」年頭。「係你做左玩家之後。」果陣仲未有玩家依個稱呼。
「嘿嘿……」佢望望自己雙手，然後話：「但係依家擁有能力既唔再得番你一個，仲有我！你唔可以再好似以前咁輕視我！」

呀方係無預兆既情況之下向我猛攻，我用眼去查佢既能力，發覺佢已經唔係之前果個連呀婆都不如既毒撚方，依家佢係強化左既爛仔方！
我勉強用自己身體機能避開左，佢既速度同力度都無佢上次打尻啲爛仔咁強，但係都足以對我構成威脅。

「停手！」我喝令佢，但係佢無任何回應，只係好似一隻蠻牛咁衝埋黎。
「你已經唔再有阻止我既資格！」

游立方is unstoppable。
我舉起雙手按實佢個頭，互相爭持。

此時熟悉既氣力bar出現，各位有玩過三國無雙應該知道雙方同時攻擊時，會出現格劍既場面，雙方要不斷禁制令到自己可以推開對方，令對方露出破綻從而進攻。
我地依家正正係咁。

「冷靜啲呀！」我大喝一聲。
【攻擊力上昇！】

然後乘此氣勢一次過將佢推開，估唔到我竟然贏到！
佢依家中門大開，我見此機會一拳直取佢中腹，希望足以制伏佢。
【造成98點傷害。】

佢既防禦力比陸小明高。

「估唔到等級三既你傷害都只係得咁多，等你見識下何謂極限既攻擊力！」
半跪係地下既呀方換左個眼神，散出睇得到既霸氣。

睇黎佢認真mode已開！

「嗖——」
「！」佢速度好快，好撚快！

「Matrix！」我打開一倍速既Matirx勉強避開，係側邊將佢推向旁邊既鐵櫃。
「棚——」

【造成76點傷害。】
佢身陷於鐵櫃入面，頭先果下衝擊力非常之大，就好似欣宜係你面前跳落水咁。

但相反，呀方承受既傷害並唔高，從外表上睇，佢完全好似無受傷咁。
唯一改變左既係眼神。

「不得不承認你既能力非常之好，難怪短短三個月你可以變到咁多……但係你捱唔到幾耐！」
佢講得好岩，我心裡清楚matrix唔可以亂開，但係佢發癲發到幾時先會解除？我唔清楚。

呀方依家既防禦力、攻擊力同速度都好高，以遊戲平衡去諗的話，佢實在係過強。
無理由，無理由會咁完美，佢一定有弱點！

另一方面，可能係我既心底裡面唔想打低呀方，所以任務並無因此催生；若果我依家收到個要打敗呀方既任務，真係含撚都唔掂！
「你仲有心情諗乜野？」呀方幾時移動到黎我面前架？

【受到326點傷害！】
屌！我右胸中拳，依拳咁撚大力都唔知會唔會骨折添！

如果佢打左胸，我心臟有事又係仆街死都唔掂。

「嘎………」打左依一拳之後，佢既眼神稍稍回復，目測佢既移動力都降低左。
既然係咁就到我！

我係近身戰既最大優勢就係matrix帶黎既速度，但係係呀方爆氣既神速面前，依個優勢亦都漸漸失去；若果要繼續打落去，限制佢既移動係必需！
我左手握住右胸，強忍痛楚衝上去，係呀方抖緊氣既時候乘虛而入！

「打掉牙和血吞！」

【攻擊力上升】

【呀方被震懾】

睇黎呀方都估唔到我有此一著。
我瞄準佢雙腳，然後一喝：「雙手割！」

佢雙腳被我捉住，然後我一拉，呀方立即應聲倒地，屎忽率先落地。
咁樣應該可以令佢盆骨震動，做成麻疹感。

【游立方進入麻疹狀態】

【游立方發動特性 — 不認輸】

屌你又pokemon？

不認輸係種特性，每當寵物小精靈進入異常狀態既時候，攻擊力都會上升一點五倍！

再加上食完依招之後，呀方既眼神又變得兇狠；我肯定佢既眼神同佢既感力有關係。

下一招唔中得，好在佢麻疹左，咁我都對避開依一招有把握。

「吼阿阿阿阿———」呀方發狂咁衝埋黎，以麻疹狀態下黎講，佢既速度意外地高！

我唔可以再好似頭先咁停火車硬接，但係我移開佢又會追住黎，依家點好？
望向遠方既後樓梯，我似乎已經有答案。

我奔往後樓梯，目光集中係石圍牆之上。
一定要有！一定要有！

我向上跑左半層，終於黎到轉角位，我期待既野出現左！
一隻白鴿降落左係牆上面，於事我大力一躍，跳左係石圍牆之上，然後再一躍而下。

而樓下等緊我既.....係一堆垃圾袋。

「屌！好撚臭！」

「彭——」

而本身追緊我既呀方收制不及，撞左埋外牆到，牆外面有幾粒石屎塊跌左落黎。

雖然啲垃圾袋好撚臭，但係其實幾舒服；體力透支既我決定係到抖番半分鐘先，係上面撞牆既呀方應該會昏迷，然後再落黎起碼要分半鐘。

一分鐘走佬，應該夠做有凸。

「吼——————」

「彭——」

係我面前，降落左一隻金獅子。

係垃圾袋上面訓住既我，根本無退路可言！

金獅子.....丫唔係，呀方出拳喇，係界王拳！

我閉起雙眼，架好防禦姿態準備硬食依一招。

但係我無把握食到，而且界王拳唔係得一下.....

「嗖——」

張開雙眼之後，預期中既痛楚無出現到。

「嘎.....」取而代之既係旁邊半跪係到既陸小明。

「你！」我好驚訝，但似乎救左我既正正係佢。

「嘎.....」佢無理到我，只係大字型咁攤左係地上面；我環望四周，依到應該係學校不遠處既一個公園。

可以肯定小明既能力係瞬間移動，而且可以帶埋生物一齊移動。

「多謝。」我搞唔清楚現狀，亦唔明佢既動機，但係我依家仲講到野，一定係拜佢所賜。

「嘎.....」小明仲係抖緊大氣，佢既腹部急速擴張同收縮。

佢係咪要抖唔到氣？我係咪應該幫下佢？

我走上前，吞吞口水。

電視戲成日都有依招出現，但係真正實行我係第一次，到底work唔work呢？
我本身已經跳得好快既心依家跳得更快，好似小鹿亂撞咁。

死就死啦！

我用左個方法之後，換黎既係一句：「我屌你老母！」
小明好歹都算講得番野，但係佢依家坐埋一邊，以好厭惡既眼神望住我。

「我見你抖唔到氣先出此下策！」
「我寧願斷氣死撚左佢！」

「有咩咁大不了姐？」
「聞第個男人隻海膽，你知唔知幾撚嘔心？」
阿摩里亞，聽講係人地昏迷果陣可以救人老母，所以我就拎個流晒汗既海膽比佢聞，果然有用。

下？你以為我會同佢人工呼吸？去搵基故睇啦你，你睇錯故喇！

「嘔———」
「你嘔左好耐喇，死得未呀？」

「條仆街作者唔撚出文我點講野呀，咪唯有嘔住先攝時間囉！」
「屌！」又賴尻個作者！

「你肯定依到安全？」我問小明，始終作為呀方條靚，佢應該好清楚呀方既能力；頭先呀方跳落黎果幕我始終心有餘悸。
「唔係個個都好似你咁有地圖能力；依到應該安全，而且就算佢再搵到我地都唔洗怕。」佢抹抹嘴角既嘔吐物，然後似模似樣咁分析。

「你咁講係咩意思？」佢講既野經常都透露住有用既訊息。
「不要問只要信。」屌！點解要咁有性格先？

「咁又點解要救我？」依個先係重點所在，小明係呀方條靚，呀方一定好清楚佢係出手救我。
點解佢要違背佢大佬都要救我？

「我唔係傻既，亦都唔會為左扮偉大而耗盡自己既氣力……」佢望望自己遺下既嘔吐物。
「講重點。」

「我做游立方既手下，只係權宜之計。」乜依家啲低FORM仔個個都咁撚腹黑，老謀心算既？
「我夠話我自己打飛機係為左用多啲廁紙振興經濟啦，點解我要信你先？」

「一係為左加速升級，二係我唔想與佢為敵。」
「由你剛剛救我果一刻開始，佢已經變左你既敵人。」相信佢都會收到【游立方對你的外交關係更換成中立】，甚至係敵對既遊戲訊息，二月十五號果朝我都收過。

「如果我救左你，可能會同佢短暫地交惡；但係如果唔救你，我永遠都要屈居於佢之下。」
無錯，依條仆街真係好撚黑；但好在佢夠坦白。

「即係你係鋪後路？」
「無錯，所以我一直賣人情比你。」

「你以為你啲人情真係咁值錢？」但係我唔鐘意一直比人計算。
「如果我頭先唔救你，你好清楚自己係發狂既呀方面會有咩下場。」

「所以你想點？」
「假若我要與呀方為敵，我希望你可以幫我。」佢露出狐狸尾巴。

「你知唔知我同呀方本身係咩關係？」
「唔知，同班同學？」

「我同佢既關係遠係同班同學之上。」或者係，其實我都唔知自己以前同呀方究竟係唔係好朋友。
「唔……………」佢握拳放係嘴唇前面沉思，似乎我令到佢算盤失算。

「但係佢依家變成咁可以話係我累左佢。」其實連眼前既小明可以變成玩家都係我既原因，但係無謂提起。
「累？」「嗯。」「累？」「嗯。」佢似乎懷疑我所使用既累字。

「佢以前係一條無人比面既毒撚，窮矮蠢毒柒乜齊；到依家變成有人要叫佢做方哥，又有錢洗，咁既轉變你用『累』字黎形容？」類似既野呀方自己都講過。
「但係你覺得佢依家開心？」但係我每日觀察佢，我都覺得佢自己係勉強緊自己。

「好，我唔肯定佢依家開唔開心……就假設佢依家既快樂指數係零。」
「即係唔開心啦。」我直接指出結論。

「你先唔好斷章取義；零只代表佢『唔係開心』但亦都唔代表佢係『唔開心』。」

「即係點撚樣呀，點解咁簡單既concept你要講到咁複雜？」

「或者我直接講，佢以前既快樂數值係負數。」

「唔……」負數同零比，零又好似真係好啲。

但前題係 — 佢以前既快樂數值真係負數？

「你都幾叻。」不得不承認佢諗得全面過我。

「如果我真係咁叻，我就唔洗靠能力先發到圍。」SAD BUT TURE。

「Anyway，重點唔係到；重點係若果你覺得自己真係累左佢，你點解唔借此機會幫佢？」

「依段對話太多一廂情願既諗法，我唔可以下定論。」

「唔……」對於自己說服唔到我，眼前既小明似乎好苦惱。

「但係我唔反感，如果呀方到情況去到失控既地步，我樂於與你同一陣線。」

佢終於鬆一口氣：「多謝你既合作。」

「但係相對地，你要清楚交代點解你要防犯佢。」

「其實好顯而易見；本身我係一個好勤力既田徑部員，我次次活動都去齊；但係自從跟左游立方之後，我成日被迫做咗我唔想做既事，你估我想做賊？但係我有咩辦法，咁樣升級真係好快，而且我承受唔到任務失敗既後果……」

睇黎既能力同移動有關，我估計佢既代價應該係雙腳。

「我本身跑得唔快，拜依個能力所賜我終於贏到冠軍。」連凌樂府都唔夠佢跑，原來就係因為佢既能力。

佢明明好矮，但係步覆好大，以我既觀察佢係移動果陣凌空果一刻用瞬間移動，所以令到步覆增大，咁就可以係唔起眼既情況之下加速。

但若果咁做的話，佢一定要每跑一步都咁瞬移一次先有顯注既效果。

佢技能既冷卻時間到底……

「真係諷刺，我明明練左咁耐都跑得唔快，依家得來全不費功夫。」佢既發言中止左我既思考。

「你覺得有能力係好定唔好？」我忍唔住問佢。

「我唔知，等個故事去到最尾果陣再答你。」

「如果你有命留到最後先講。」

「積下口德啦你條仆街。」

「入番正題;要打贏游立方, 靠我地兩個係唔夠。」

「佢係咪真係咁勁呀?」雖然佢真係好勁, 但係一秋二咁把炮? 你姓葉名子丹?

「佢肉搏方面有幾勁你應該好清楚?」

「開左大既神裝本多忠勝.....應該咁上下。」

「依家無人玩信長架喇, 你可唔可以update下你既比喻呀?」

「神裝既蠻王囉, 你滿意未?」屌你老母, 無信長既熱潮, Lol邊得黎普及得咁快? 你班唔識飲水思源既仆街!

「就係咁, 以我地既肉搏能力黎講, 就算二打一都毫無勝算。」

「咁點算? 出Forzen Heart加埋Omen夠做未?」

「你打算剩係捱打? 你要記住依家無隊友幫你dps, 你再坦都無用。」又好似係。

「咁你想點呀?」

「一支竹仔易折彎, 幾支竹仔易折難。」

「.....」

「一個唔夠揪搵兩個, 兩個都唔夠就搵三個。」屌, 同啲乜野戰隊一樣, 自稱正義之師, 到頭黎玩圍揪!

「咁要搵乜人? 紅戰士定黑戰士?」

「要打贏呀方既方法唔係無.....一、搵個好揪過佢既人;二、搵個識控制技既人, 又或者三、搵個坦得住佢既人。」

「要變成有錢佬既方法唔係無, 一、你老豆叫做李嘉誠;二、你識得幫小甜甜按摩, 又或者三、你中撚左六合彩。樣樣都係講就易做就難, 你有無啲更可行既方法?」

「一係拎綜援囉。」

「屌!」

好揪過呀方既, 起碼要搵隻咁上下肥既master yi又或者irelia, 但係你估咁撚易咩? 控得住呀方又或者坦得住佢既人應該會易搵好多。

「我明白喇, 我會試下搵。」好過收埋雙手乜撚都唔理。

「咁我等你好消息。」

「希望仲有命見你。」呀方搵到佢一定會屌爆小明個老母。

「希望下次見到你你仲講到野。」屌你又話唔想得罪我既?

* * * * *

「喂？」

「水牛哥～」我用一把好姣既聲音。

「.....」

「好，認真mode，你方唔方便傾兩句？」

「講。」

我將結盟既idea講左一次。

「我唔反對，畢竟呀方既存在好有威脅.....但千祈唔好影響到自己學業，會考好快就到。」

「得啦，有你幫拖一定好快搞得掂。」我估唔到咁易就說服到水牛。

「等等。」

「等乜？」

「我唔反對唔代表我要加入。」

「蛤？」係非黑即白，十萬人上街就代表六百九十萬人反對既香港竟然仲有人咁理智？

「你可以搵其他人，我唔會阻止；但係我本身對依個提案不感興趣。」

「點解呀？」你話搵其他人，你估玩家真係咁多咩！

「你講過，你地要搵肉搏戰勝過呀方，又或者可以控制或再退一步，可以坦住呀方既人，我無講錯？」

「無。」其實三個條件係依次序排列，越前越有利。

「可惜我三樣都唔係。所以相比起無興趣，無能為力先更可以表達我既處境。」

「下？三樣都唔係，咁你能力係乜？你係咪真係玩家黎架？」依三個條件其實都包括左好多我諗得到既能力.....係依個範圍以外既可以係乜野呢？

「你信唔信都好，我唔會害你。我要食飯，係咁先。」

「嘟———嘟———」

.....

跟住落黎得番一個選擇。

「小智我屌你老母。」

「我警告過你唔好屌我老母！」

我同佢用遊戲系統黎對話。

「有單好野益你。」

「咩好野？成功爭取綠公仔延遲兩秒？」小智既回應入面充斥住戒心。

「傻豬黎既，咪拎我同民賤聯班仆街相比先得架。」

「唔係丫，以仆街既程度黎比較，你夠資格坐譚耀宗個位啦！」

「唔好再講政治野喇，一黎未必有人識，二黎民賤聯睇到要林早洩封post就唔好啦！」

「咁入正題啦你，屌！」

於事我又將聯手打呀方單野講左比佢聽。

「唔………」

「係咪好提議呢？」

「我唔想參加。」

依一句將我打落深淵。

「whyy」我吶喊。

「原因好簡單，我唔想幫你抹蘇洲屎。」

「何出此言先？」講野轉灣抹角已經係依篇故入面既特色。

「你諗下，點解呀方會變成咁。」

「因為你班仆街比能力佢囉！」無能力的話，呀方就只係一條毒撚。

「等等，我已經唔再係gm，唔好將我同佢地稱為同一班人。」依家小智只係一名石拓斯既凡人。

「fine，咁我修正為『因為有班仆街比能力佢』。」真係好撚小囂，小小錯漏都要捉我。

「咁點解班仆街會比到能力佢？」小智引導緊我。

「因為……」

「比啲提示你丫，二月十四號呢。」

「哦，我記得番喇，因為你條廢柴死撚左！所以gm個位懸空左！」我係百鳥塔死果幕，全知咁樣同我講過。

「咁你又再諗下點解我會死左？」

「唔………」

「係囉，醒番起未？」

「醒唔起喎，嘻嘻^^」

若果你未睇一季就睇二季，又或者你唔記得左，請你去睇番市鎮公園篇。

依段對話，最後小智以一句：「所以我唔明白點解你條仆街可以咁撚厚顏無恥咁黎搵我幫拖，你有無諗過加入民建聯依個咁有前途既政黨？」黎結束。

Fine，玩家咋嘛！我再搵咪係囉！

你估作者會由得我死咩？

二章二節完結

二章三節 回想

依家已經係夜晚十點，我身處於屋邨既公園仔入面。

「所以，你以為咁樣道歉我就會接受？」

「對唔住，因為係任務既關係，所以我不得不做！求下你原諒我啦方哥！」我向眼前既人誠懇地鞠躬盡瘁。

「任務？」方哥對我既解釋有所懷疑。

「係！雖然我既意願會驅使任務出現，但係任務亦可以違我意願既形式出現！」

正如偷電話之類既野根本唔係我所願。

方哥冷笑一下，然後話：「嘛……」

我誠惶誠恐咁望住佢，期待佢下一句。

「反正都唔係重要人頭，遲下再收割都唔遲。」方哥吐一吐煙，然後續道：「之但係……若果比我發現係你對我有異心的話，你好清楚下場會係點。」

佢從長椅上跳落黎，然後行過黎蹲低摸一摸我既左腳：「就算你識瞬移都好，你都知我要擊倒你係易如反掌。」

我既左腹隱隱作痛，令我回想起二月十五號朝早——亦即係我初初獲得能力，與方哥相遇既朝早。

* * * * *

【任務：成功從毒撚A手上奪取電話並成功逃脫】

「點解任務要迫我做啲犯法既野？」我問自己。

但係遊戲既說明講得清清楚楚，任務失敗次數過多，會令我失去與能力相應既身體機能。

我望住前方既毒撚，雖然佢年齡比我大，但係睇佢既身形同外貌，都只係一個終日係屋企對住螢光幕既毒撚。

就算我係田徑部入面跑得最慢，應付依種毒撚都應該綽綽有餘！

於事我從後慢慢接近，然後一推令佢電話跌出黎，我馬上接實之後望實前方不遠處既位置。瞬間移動！

就係下一刻，我已經身處我剛才目視處，我既第一個任務比我想像中簡單！

「從我身上奪取我財產既人，已經太多！」毒撚忽然咆哮，我本能話比我知我好危險，於事望住上方既簷篷，令自己瞬移上去。

咁樣就算你跑得再快，都捉我唔到啦！

「吼————」毒撚大力一吼，同時跺腳，地面上既磚塊都被佢踩得碎裂！下一秒鐘佢就大力一跳，捉實簷篷既邊緣，然後輕輕鬆鬆咁上到黎。

能力仲未冷卻完畢……點算呢？

係，就算無能力，我都係田徑部成員！

跑，跑啦！我望向前方一直跑，身後既毒撚不為所動。

果然，佢要爬上黎就已經用左九牛二虎之力，有能力就係唔同啲！

「嗖——」

下一秒，我眼前一暈，數秒後發覺自己雙腳離力，頸部傳來劇痛。

無可能！依個看似手無搏雞之力既毒撚，竟然單手舉起左我？

「你以為有能力既只有你一個？你無資格睇小我！」

「放……放……放手……」我抖氣抖得好辛苦，但係同時我不斷掙扎，只要佢一鬆開手我就可以瞬移走！

「哈哈……你以為你係獵人我係獵物？好似你咁樣既羚羊竟然妄想可以狩獵獅子？哈哈——」

佢力度減細左，好機會！

我用腳踢佢既腹部，然後乘佢鬆手既同時瞬間移走。

拎住部電話既情況下瞬移，冷卻同距離限制都會大好多，但係我無選擇！

我著地之後拔足狂奔，走！一定要走！
估唔到個毒撚都係能力者，點解我咁黑，第一個任務就對到能力者？

毒撚以超快既速度衝緊埋黎，睇佢既樣就好似一隻衝向獵物既熊一樣！

「嗚——」好痛！
佢將我壓埋去牆果到，另一隻手捉住我右手手腕壓係我腰後面，前後五秒都無！

「所以，我咪話左我係獵人，你係獵物。」
我全身失去能量，手中既電話亦都跌左落地。

【距離任務失敗尚餘三十秒，請於限時內重新獲得電話擁有權】
佢既力度今次無減少到，我就算不斷掙扎都徒勞無功……任務限時一秒一秒咁倒數……

三……二……一……

「唔好……唔好呀！！！！！」

【任務失敗】

「嘿……」毒撚終於鬆開雙手，將我好似一舊垃圾咁推埋一邊。
左腿於下一秒傳來劇痛。

「阿————」係抽根既痛楚。

【任務失敗懲罰debuff尚餘：三分鐘】

「哈哈，睇住獵物受苦既樣真係一種享受，我終於明白以前其他人係點睇我。」
我無餘力留意佢講乜，左腳既痛楚已經抽乾晒我既注意力！

「嗚哇————」

「哈哈————」

依三分鐘，係我人生至今最痛楚既三分鐘。

【Debuff解除，能力恢復】

三分鐘過後，抽根感覺立即消除，但係左腳依然有陣陣餘痛。

「你既debuff時間真係短……但係若任務再失敗多幾次，就算唔受到系統既制裁，單係抽根

既痛楚已經足以令你痛不欲生？」
我望住佢，我估唔到依個毒撚竟然有依種能力……

我唔敢用鏡望自己，我唔敢想像自己依一刻既眼神有幾怯懦。

「但係你既能力都尚有用處，以後就跟我。」
「點解！」我用僅餘既勇氣提出抗議，若果我要跟佢，我以後都唔會有好日子過！

佢又叉住我條頸舉起我話：「我只係通知你，唔係徵求你同意……你要記住就算唔洗任務，我既能力要致你於死地都綽綽有餘。」
我就算再靈活，係佢面前都只可以逃走……

但係以我依家既等級，恐怕連逃走都做唔到……

我只可以忍，忍……忍到我等級足以對付佢！
「大佬……我以後聽晒你話……」

佢鬆開心放低我，然後背住我深呼吸話：「大佬……依個稱呼唔錯，以後就叫我做方哥。」
「方……方哥！」

「不過，你要詳細交代自己既能力係乜，否則我就立即殺左你！」
佢竟然連我反擊既手段都封殺埋！

無喇……我既人生完喇……
但係我苦無選擇……我真係好無用……

本以為獲得能力係一件好事，但只不過將我由一個地獄之中移去另一個地獄……

我只好一五一十咁交代自己既能力，同埋限制。

「既然你既之前任務係偷電話，你由今日開始就繼續係依個屋邨入面搵目標落手升level，我會搵其他人黎配合你。」
佢吹一吹哨子，另外兩個童黨出現。

「你地三個今日開始一齊行動……唔洗旨意可以逃走，我好清楚你能力既限制係乜，以我既腳程你係無可能走得甩。」
「我點敢背叛你呢方哥！請你好好期待我既表現啦！」
「唔……岩聽。」

忍，我依家只可以忍！

二章三節 回想 完結

二章四節 潛入

「既然知道自己既處境，應承我下次唔好做依類擦車邊既行為好唔好？」
方哥收回佢既手，但係我左腳既餘痛無因此消失。

「你知道我脾氣唔好，好易會𦏧，而我一𦏧就會發癲；一發癲……」講到依到既時侯佢瞄一瞄我。「就會催毀附近所有野。」
佢既眼神就好似一把鑊刀一樣係我頭上擦過。

「明白。多謝方哥你大人有大量。」我急忙點頭。
「等等。」

「係？」
「邊個話我原諒你？」今次弊。

我即刻五體投地，低聲道：「方哥請問你點先可以原諒我？」
佢上前將我扶起身：「唔洗跪。」

當我眼神與佢接觸之後，佢續道：「你知道跪係無用，我要既係實在既付出。」

「我有咩可以幫到你？」佢就係一直用依種態度要我幫佢做事。
「其實只係好簡單，我有一部紅色既PSP比隔離學校既人拎左，我想你幫我拎番黎。」佢盡量用一種輕鬆既語氣，令到依個任務睇起上黎好簡單。

的確以我既能力，做依類既潛入任務係最適合；但係若果真係咁簡單，佢又洗乜講咁多野黎說服我去做。
而且佢依家既財力根本唔洗執著一部PSP。

「部PSP有咩特別？」我問。
佢回頭，帶笑容地話：「我叫你做。」忽然，笑容收起轉變成充滿殺氣既眼神：「你唔準過問。」

我吞一吞口水，然後話：「對唔住。」
「唔緊要，我一向最大方，只要你聽晚拎到出我，我唔會追究乜野。」

方哥依個人，幫到佢既佢有好好既待遇。

做唔到野既，佢就會當垃圾咁丟埋一邊。

最弊既係 — 我係玩家。

* * * * *

翌日，放學時間。

要潛入第二間學校，當然係等放學時間。

我仲特登番屋企換左便服，就算比人見到都唔怕自己身份比人懷疑。

依家已經係黃昏時間，係時候開工。

【任務：尋回紅色PSP】

任務已經出現，許勝不許敗。

我輕易地使用能力進入操場，由於我唔知道入面會唔會有敵人，穩重起見我唔敢用距離太長既瞬間移動。

除部PSP係紅色之外，我既訊息就只有一個：部野係圖書館。

點解佢會知道呢？我唔知道。

依個時間隔離學校都得番好少人，而且就算佢地見到我都唔覺得有異樣。

如果依個時間我有地圖既你話幾好，但依個唔係我既能力，我只可以慢慢搵。

若果依間學校同我地學校構造一樣，圖書館應該係第三層。

我徒步行上第三層，完全無用過自己既能力，比我想像中輕鬆。

「圖書館……BINGO。」

門鎖住，不過完全難我唔到。

我閉起上眼，再開眼既時候，已經係圖書館入面。

好大陣書味，冷氣為左保存啲書亦都無熄，除此之外漆黑一片。

觀察完，係時候做正經野，我掃瞄四周，點睇都唔似有PSP依種同依到格格不入既野。

我行到黎行媒體房既門口，入面傳出好細既交談聲音。

依間房既隔音能力比一般房好，我剩係聽到吱吱聲，完全聽唔到交談內容。

但係瞬移入去又太魯莽，雖然依種距離要再用瞬移唔洗冷卻好耐，但係我唔想打草驚蛇又或者有任何危險，我決定係門外守候。

方哥叫我黎搵PSP應該唔係咁單純，入面既人同依單野好可能有關！

數分鐘後，房門打開，我立即瑟縮於一角。

「保持聯絡，小心為上。」一把中年聲音。

「我辦事你放心。」一把剛陽既聲音。

聲音剛陽既人手中拎住一部紅色PSP。

目標鎖定，準備開工！

我目送佢地離開，一個行左，一個行右。

等佢地兩個距離拉遠到不能互相照應我就會行動。

我慢慢移至門口靜靜觀察，中年男人已經行落左樓梯，睇黎依家係機會！

剛陽男人離我唔算遠，依個距離用瞬移冷卻只係三秒左右，只要三秒我就可以再跳。

我深深呼吸，然後瞬移至剛陽男人身旁對佢拎住PSP既手攻擊；因為我攻其不備，PSP輕鬆入手。

剛陽男人見到我並無吃驚，只係暗唸：「原來唔係我心理作用。」

佢右手掌伸成手刀狀向我一揮，佢神情輕鬆，就好似完全唔將我放係眼內一樣。

但係依一刀並唔係特別快，所以我向後一縮已經避到；但係佢無比我休息，係右手手刀劃過之後立即用左手補一拳，我立即側身迴避。

就係佢左臂之下，佢原本鬆弛左既右手立即拉緊一拳擊出！

係吋勁！

我依家只係靠腳尖支撐自己，仲側身側得好勉強，依拳如果我再避就會失平衡跌低！

依拳只可以硬食！

「嗚——」我低嗚一聲，此地不宜久留！

我立即將PSP拋出走廊露台外面，然後使出瞬移，係PSP既預定落點準備迎接。

唔帶埋部PSP一齊瞬移係因為咁樣會令冷卻時間上升，之前係商場比劉驚波追果陣我丟部電話落街亦係同一原因。

我係地下果齊舉高隻手準備迎接部PSP，望見剛陽男人皺皺眉。
但係佢無企係到等，佢立即蹣出，腳踏水管然後一躍，將PSP重新奪入手裡！

依家光源充足，我睇清楚佢個樣……浩南哥？

「我唔知道你點做到剛才一連吋既動作。」佢舉起部PSP續道：「但係係邊個叫你黎？」
佢咁講只有一個可能性 — 佢唔係玩家！

若果係玩家，一定知道有其他玩家既存在，見到任何常人做唔到既舉動都肯定會見怪不怪，
將之考慮為能力。
但係係凡人眼中，我地既技能係魔術。

「你問我都唔會講。」其實我完全唔知道部PSP入面有乜野，更加唔知道對方係乜野人。
「其實我都知道……只不過我唔想使用非必要既武力。」佢立即擺好姿態準備迎戰。

我要走好容易，但係PSP係佢手上，而且我有任務係身，非打不可。
可惡！我又比任務迫入絕境！

亦因為PSP係佢手上，我被迫做主動。
對手既武功非常高強 — 佢既強唔同呀方，呀方係數值上既強，而浩南哥係技術上既強。

我徒步接近，先以花拳繡腿探路，浩南哥完全無比我打急，佢應該有過嚴格既武術練訓先練
到依種技術同心態。
浩南哥並無捱打，佢間唔中亦都會出番一拳半拳黎攻擊我，佢打既位置就好似計過晒一樣，
只不過因為我留左瞬移，所以都可以用能力緊急避開。

就好似你打高達果陣爆SEED避招既效果一樣，帶依粒SEED所賜，我同佢暫時都未成功擊
中對方。
「迷蹤步？但係迷蹤步解釋唔到你頭先極速跳落留既舉動。」

「你咁有閒情逸志去問點解？」雖然我咁問，但係原因顯而易見。
我根本威脅唔到佢，佢只係玩玩下既性質。

「因為PSP仲係我手上。」
任務限時慢慢倒退，再係咁唔係辦法。

「係時候認真。」佢又係好似頭先咁連出三拳，將我迫入死角。
但係今次唔同，我既瞬移已經CD完畢，而且係佢出拳既同時專注力集中左係前方，後方露

出好大空檔。

係機會！

我立即瞬移到浩南哥既後方，正當我以為得手既時候，迎來既竟然係一腿！

「你既步法好好，但係單靠步法係唔足以成為高手。」佢錯左，我既步法根本唔係步法，我根本係個武術白癡！

「若果我有你既步法，我根本唔洗試招都已經制服到你。」依句到底係讚我定係彈我，我唔知。

我只知道……

【00:03】

【00:02】

【00:01】

【任務失敗】

「呀—————」

左腳既痛楚！

* * * *

「嘎……嘎……」

「如果你頭先既慘叫係演技的話，你可以考慮轉行。」

「唔係演技。」我左邊小腿的而且確係痛到仆街。

今次既懲罰時間係五分錯，但係我雙腳依然控制自如，睇黎我既玩家資格仲未被除去。

此時，我既雙手已經被綁係欄杆；由於我唔可以自由行動，所以唔可以利用自己既能力逃走。

依家既我任人魚肉。

浩南哥蹲係我面前，望住我：「不如由你係邊個開始講起？」

「你覺得我會乖乖交代？」

「即係咁，我自問脾氣ok……」佢企起身，係我面前踱步，續道：「之但係……我呀哥脾氣未必有咁好。」

「……………」

「咁啦，我比十五分鐘你，你好好善用時間組織下你想講乜野啦。」說畢後浩南哥就獨自離去。

十五分鐘，應該趕得切！

二章四節 潛入 完結 待續

二章五節 迎救

【你有一則未讀訊息】

【跳躍者：我係隔離學校比個非玩家做低左，依家比人綁住左走唔到，佢話比十五分鐘我，我唔知之後會點。】

「屌！」係老麥咁緊豬柳強既我屌左一聲。

「做乜？」同我溫緊書既桑妮問。

「對唔住，我有事要做，要走先。」依單野唔幫唔得。

一黎，小明佢強調對手係非玩家，可以將玩家擊敗既非玩家依一樣野令我匪而所思。

二黎，小明同我依家算係盟友，我有難我會期望佢黎幫，佢有難我都會幫佢。

三黎，我怕小明會令玩家依樣野曝光，我唔知後果係點，但係跟據多年睇動畫既經驗，我知道依類能力係要保密。

「唔緊要啦，其實我都差唔多要番屋企。」

「電話聯絡。」

「嗯。」

水牛勸過我既野我無忘記，依家我一有機會就黎老麥溫書兼拍拖（雖然我懷疑溫書既成效）；但係要我唔理玩家既野，唔得！

* * * *

我黎到鄰校附近，已經見到陸小明比人綁左係籃球架條柱到，我離遠觀察佢既同時密語佢。

【觀察者：敵人有幾多個？有咩特點？】

【跳躍者：暫時得一個，但係估計會黎多個。唔似有能力，唔似知道玩家依樣野，但係好好秋】

【觀察者：你近戰能力根本唔勁，會唔會係咁你先覺得佢勁呀】

【跳躍者：堅係勁秋唔係講笑，點都好你入黎救左我先啦】

【觀察者：你都慳尻，我唔似你可以自出自入，梗係睇定啲先】

我地係腦海中對話，不得不說依個系統非常方便。
觀察左三分鐘之後，我睇唔到有任何異動，成個操場又真係無人，於事我趁無人行過既時候爬欄杆跳左入去。

我保持警戒咁慢慢行過去小明到。

【跳躍者：快！】

「依個距離用番口講啦戇戇仔！」我不禁吐槽。
用口講始終爽啲，sd message好似無左語氣無咁生動。

太陽已下山，四周街燈著起。
亦因為咁，我好難睇清楚綁住小明既結，好難解。

「好痛呀，你小心啲得唔得呀？」
「一係你解囉！」
「我比人綁住左點解呀？」
「咁你就咪出聲啦！我依家賴低你係到都得呀！」分清楚主客關係啦戇戇仔！

「話時話點解你會比人捉左係到？」個結真係好難解，係時候一路解一路厄水吹。
「因為方哥既指使囉？」

呀方既指使？為左乜？

「時間到喇喎，你諗掂未呀？」我諗依條友就係小明口中既非玩家。
雖然依家好暗，我睇唔清佢個樣，佢亦都睇唔清我個樣，但係毫無疑問佢注意到我既存在。

「咦？多左個朋友？」聽佢把聲佢應該係十七至十八既歲既青年。
「解開個結佢。」我以命令既語氣。
無錯，個結咁難解我唔已經唔想解。

「我雖然脾氣好，但都唔鐘意人地命令我；除此你比我強啦。」
等我睇下你條仆街係咪真係咁勁！

佢扎好馬等我；雖然識扎馬既唔一定係高手（例如我），但係唔識扎馬既一定唔係高手，眼前依個人至少合格。
見到咁，我都唔敢魯莽搶攻，我都扎番馬等佢。

「喂，唔好浪費讀者時間啦，你係自己禁區猜波你唔怕失波咩？」

「底線傳底既野你識乜丫？」你都唔急，我急乜？

「即係咁，我有時間可以同你慢慢猜波，但係陣間黎多個既話我怕你唔可以以一敵二喎。」係喎，小明都有提過估計會黎多個。

屌，迫尻我攻！

我將地上面既空鐵罐踢過去佢塊面到，佢出手檔開，但係佢隻手係依個時候檔住自己既視線，係我攻擊既機會！

各位讀者應該有留意我好鐘意打人腹部，因為打腹部啖啖肉，你揀女都揀啲心口有肉架啦，唔通J胸骨咩？打胸打背咁多骨打到自己手都痛啦！

今次我都唔例外，我一拳鐘埋去佢中腹到。

「唔，所謂兵不厭詐我唔會話你卑鄙，但係你依個戰術真係好狗。」卑鄙同狗有咩分別？我原本檔住鐵罐既左手同原本聞置緊既右手一上一下咁夾住我隻手，我隻手係擊中佢之前已經被停住，蚊唔番出黎，畫虎不成反類犬。雖然係咁，但係一隻手換兩隻手，似乎我係有著數。

你話我狗？我用啲仲狗既招比你睇！

我伸出左手，放係佢個頭上面，然後出盡力扯佢頭髮！

「SHIT!」若果你有親戚有養兩三歲既細路的話，你就會知道佢地有一招必殺技叫做蚊頭髮。

你唔明點解佢地咁細力都可以搞到你咁痛。

依家我大力咁蚊，佢地頭髮甩都似！

一陣劇痛由我下體傳上我大腦。

「我屌！」原來佢係我將專注力放係上半身既時候用膝頭哥頂我小驚波！

我地本身僵持不下既雙手依家已經鬆開，我同佢都帶痛後退，佢摸住個頭，我摸住小驚波。本身我所期待既高手較量竟然變左做小學雞打爛仔交，WTF？

佢：「你……你好卑鄙！」

我：「你出腳撩陰就唔狗？」估唔到條仆街仲好意思話我！

佢：「你狗先架！」

我：「但係你狗過我！」

佢：「你狗啲！」

我：「你仲狗！」

佢:「你最狗！」

我:「你最無恥！」

佢:「你更無恥, 加入民建聯啦你！」

小學雞打完之後就係小學雞噏交, 爭在未出動話比你媽咪知。

「你兩個鬧夠未呀? 你地有無諗過我感受呀?」連係旁邊比人綁住既小明都睇唔過眼出聲。一陣死寂。

「你浪費左我五分鐘。」佢咁講。

「你係唔係都要係到戇戇等架啦。」

「又好似係, 咁我改一改 — 你消遣左我五分鐘。」乜依家啲奸角咁坦直既?

又一輪死寂。

「你仲打唔打架? 我雖然脾氣好, 但係我無乜耐性。」佢問我。

「打!」雖然我咁講, 但係我完全無郁過。

又一輪死寂。

「講一套做一套, 你真係好似民建聯一樣咁無恥。」

「係立法會選舉期間攻擊候選人比人當做選舉廣告架, 你申報左未呀?」

「我又唔係話係時代廣場放炸彈, 怕乜?」

妖! 啲讀者等到咁夜唔係想睇你啲選舉廣告, 等我替天行道, 幫讀者打戇你條仆街啦!

MATRIX!

我繞到佢身後, 利用牆壁使出RIDER KICK, 任你武功再高, TOYATA都係無得同法拉利打!

但係忽然間, 有個神秘男子以大概0.65倍既速度衝入我同目標之間, 雙手交叉護胸將我既拉打KICK檔住。

【造成88點傷害!】

「我為左等你比人蚊我啲頭髮, 若果我甩頭髮溝唔到女入你數。」

「情況點?」眼前較高既男人完全無視左佢身後較矮既男人。

天色好暗, 我完全睇唔清楚佢個樣。點解操場入面一支街燈都無?

「佢蚊我頭髮呀!」

「……………」高男將頭擰番黎我依面，我吞一吞口水，佢散發出既氣息同矮男既完全唔一樣。

矮男係好好懶散好唔認真，但係高男就係認真撚。

高男一聲不發就一拳打過黎直取我頭部，好撚狼！

而且出拳速度非常之快，係我開兩倍Matrix既時候佢可以以0.65速度檔住，即係正常速度之下佢係我1.3倍既速度！

若果我個頭比佢打中，我就會即刻昏迷，到時連自身都難保，於事我係0.02秒之內決定再開Matrix，僅僅避開佢既一拳，然後反攻佢。

豈料佢好似一早估到咁，另一隻手一早已經係到等緊我，將我捉住。

Matrix一解開既時候，佢將我fing開，將我摔去牆角。

【跳躍者：你氣力bar消耗得好快，再用能力你就會氣喘架喇！】

仆街，我唔用能力依家下一秒一樣仆街，依家用又係唔用又唔係！

New challenger!

正係我心諗今鋪一定滿肛紅既時候，有條友忽然出現檔係我倆之間。

好型呀！

下一刻，New challenger被高男打開八步咁遠，然後仲好狼狽咁跌係垃圾桶隔離。

屌，好柒！

「嘿嘿……」

依把聲……原來係呀方！

「做乜呀？發覺做爛仔無人氣，決定行番以前慳仔路線？」

「依條友由我黎應付，你去救我條靚。」佢無視我既發問，然後好型咁係垃圾堆中起身。

唔係話唔信你，但係你上一頁先比人踢到七丈咁遠，好難夠打喎！

但既然你咁講到，比人打死都無怨啦，所以我乖乖地行番去籃球架果面。

「即係咁，我都知我無咁好揪，但係你可唔可以唔好當我死左？」矮男阻檔住我既去路。

「人地打交就搏晒命，我地打交就扯頭髮撩晒陰，你仲好意思出聲？」

「哈哈，好笑，因為我脾氣好咋，我怕我認真打會打死你。」

「睇下邊個打死邊個？」今次我無慢慢等，一講完句說話就行埋去亂打。

【造成66傷害】

【受到72傷害】

【造成88傷害】

【受到91傷害】

我同矮男都已經完全放棄防守同迴避，剩係係到你一拳我一拳，根本係換血。

「嘎………」我同佢都抖晒氣。

「喝———」係我同矮男同峙既同時，呀方同高男已經打到埋黎。

呀方既出拳又快又狠，但係準繩度欠奉，係門外人眼中佢好似漸左上風，但係我同矮男同好清楚，高男完全掌握左戰鬥既節奏。

講速度，高男唔會輸太多，雖然佢既力度唔算大，但係佢久唔久就係迴避既同時送番一招比呀方，奇就奇在呀方完全唔避，任佢打。

就係我以為毒撚方打落去一定輸既時後，佢儲晒氣咁一拳泵埋去，估唔到高男避唔到，比佢一拳打退幾步。

高男無立即反攻，佢企係擺一擺姿勢以防呀方再進攻，然後就停左。

「你條契弟頭先打得我咁型？跟住落黎先係戲玉！」

「……………」高男無出聲回應。

「呀哥你竟然唔夠依條友打？」

「佢好怪，一般黎講人既身體機能會隨住戰鬥消耗而越黎越差，但係佢好似越打狀態越好咁。此消彼長之下我先會中依一拳。」

呀方既能力係乜野，我同大部份讀者一樣心入面都估到啲，但詳細點運作我依然全無概念。

「喝———」我仲諗緊野既時侯，高男又再展開攻勢，佢一腳將呀方踢上半空，就同啲格鬥漫畫一樣，就好似完全將重力既重要視忽視左一樣！

下一秒佢又躍至呀方既上去，用腿一鞭落呀方既身上，短短兩秒間呀方就由地面被人踢上半空又被人踢番落地。

我以為高男既體力已經被消耗得好緊要，豈料佢仲有咁大既力氣完成成套動作。

「我賭，我賭你唔會再擊中我。」

呀方慢慢爬番起身，然後話：「睇下點。」

高男無等呀方企定就立即再搶攻，佢使出春麗既絕技——風車腿，相對起頭先既穩守突擊，高男開始用咁大開大合既高殺傷招式！

呀方企係到無郁，直接用腰硬接左佢一腿，但一會似乎盡在佢掌握之中，佢捉實高男條腿，然後不斷自轉將佢FING番出去。

高男就好似貓一樣咁靈活，佢係跌落地之前已經調整好姿勢，仲擺晒POSE咁落地，呀方依招似乎無乜威脅。

但跟住落黎高男似乎有啲避忌埋呀方身，就算呀方食晒招，從佢既表情上都根本睇唔到痛楚。

唔埋身，又可以點攻擊呢？

「柯U極！」高男竟然發出左一球氣功波？呀方見狀都似乎有些少意外，佢出拳左散左個氣功波，但係係氣功波本身既餘燼照耀下，我見到佢既皮膚好似被燙紅左。

【跳躍者：莫非佢都係玩家？】

無可能，如果係玩家的話，佢一定留意到我地三個都係玩家。

然後，腦海中忽然閃過一個久違既名詞。

NPC化。

NPC化係將我地身邊既人既機能調整以配合我地既遊戲進行，例如之前係市鎮公園比差佬追，又或者係呀飯尾行果幾單野，統統都係NPC化既影響。

若果差佬可以踩坑渠蓋加速，高男會出柯U極都唔出奇！

但係我仲未敢肯定，因此無答到佢。

如果對手識放柯U極的話，繼續比人拉開距離對呀方本身無著數，因此呀方開始積極拉近距離。

高男用拉打戰術，放完柯U極就退開，但始終呀方唔係行得慢既人，加上儲氣放波需時，高男放兩次柯U極之後已經比呀方打到埋身。

見到依個狀況，高男以極快既速度出拳，驅趕呀方；就咁睇，依拳根本唔係往呀方既方向打，但係依拳打出既同時，有一道非常刺耳既聲音產生左！

我企係一段距離之外都覺得刺耳，要雙手掩耳，何況就企係佢前面既呀方？

呀方跳後兩步，忽然間，一道雷打落呀方身上，佢無受到傷害不特止，仲發出全身金光！

佢身上既金光持續散發不去，睇黎佢已經進入超級毒撚人既狀態，我依家反而開始擔心高男會唔會比人打到入廠。

「快啲出界王拳！快啲噴電流！」矮男道。

「你好想你個高男死？」

「唔係，我只係燃左；by the way my brother will not be defeated anyway.」

呀方將高男打起，然後往上去乘勝追擊。

豈料高男一招柯U極打埋去呀方對眼到，原來已經躍起左，好似好型棍既呀方即刻跌落地典下典下。

莫非型兩秒柒一世就係呀方既命運？

難得金獅子典下典下，高男立即上前補刀。

「吼——」呀方立即向後打個空翻，然後再往前撲。

顯然高男都估唔到呀方會起身得咁快，任佢再快都檔唔到依一招。

高男被打到大字型飛開，睇黎今次真係打得痛。

「嘿……」呀方露出奸詐既笑容，雖然金獅子會食閃光彈，但係呀方就直用左依個思想黎厄高男。

佢既超級薩亞人狀態漸漸解除，金光消去既同時，佢既皮膚竟漸漸浮現出傷痕。

呀方開始展露出疲態，但另一邊雖然高男受左好大既傷，但係佢仲企得起身。

「勝負已分。」高男以一副勝利者既模樣行埋黎。

雖然我同呀方敵我難分，但係見到咁既情況我都不自覺行埋去呀方旁邊。

我想保護佢！

「我勸你投降啦。」矮男道。

雖然我到依家都係睇唔清楚佢地兩個既外表，但係高男從高而下望住我，加埋天上既月亮，佢此刻霸氣無比。

我腦入面立即運算，點樣先可以係有限既氣力限制之下將佢地兩個擊倒。

高男雖然能力高，但估計佢食左呀方全力兩招，剩低既HP唔會好多。

反而矮男係個威脅，佢能力無咁勁，但係我同佢頭先打既小朋友交根本扣唔到佢幾多血。

「Matrix！」我暗唸。

高男同矮男依家相隔仲有一段距離，唯一既機會係依家！

我高舉右手，瞄準佢顏面。

高男見狀便以0.65倍速雙手護頭，但一切都係我計算之中。

可能係高男已經有傷在身，所以已經失去剛才既理智。

頭先既佢一定唔會用雙手檔，甚至可能會反攻我。

依家佢雙手都護頭，有破綻。

因此我打開Angry bird，務求將佢既死穴擴展到最大！

係Matrix下開angry bird，隻雀既拋物線會被瞄繪出黎，咁樣都射唔中真係要一死以謝天華。

【獲得1024點經驗值】腹部再次中拳既高男又再大字型被擊退，既然我獲得巨額經驗值，就代表高男已經唔可以再戰鬥。

「嘎……嘎……」

「呀哥竟然……」矮男一副難以置信既樣子。

我一直都期待打完高男之後會升lv 補血，但係我既如意算盤無打響，依一刻既我氣力已經見底；就算我仲有體力，用唔到技既我根本唔可以同passive技都足以打撚死我既矮男隻揪。

我下意思地行番去呀方身邊，已經跪左係到接近無意識既呀方完全無自理能力。

「雖然我脾氣好好，但係將我呀哥打成咁……唔可以原諒！」矮男本身懶散既眼神變到十分兇狠，佢既能力大大提高；正如你玩三國無雙果陣唔會慇矻咁未打呂布就打貂蟬，因為貂蟬一死，布哥就會爆seed，然後就會變成一舊bullshit。

我估唔到高男先係貂蟬，更估唔到矮男係呂布；面對矮男來勢兇兇，我只可以用跟女俠學番黎既基本武術頂兩頂。

【受到110點傷害】

【受到107點傷害】

【會心一擊！受到243點傷害！】

我左面頰中拳，依拳打到我神智不清失去平衡。

忽然眼前一黑。

「咳……咳……你兩個明明黎救我……最後竟然要我救番轉頭……嘎……」小明嘆氣道。原來小明已經解開左條繩，仲用能力一次過將我地傳送去番自間學校既禮堂。

「嘎……嘎……」上次帶我一個傳都拎左佢半條命，今次一拖二對佢負擔一定好大！我、呀方、小明三個都大字型咁訓左係禮堂到，望住個天花。

「嘎……」係禮堂入面既只有喘氣聲，頭先既戰鬥對我地三個消耗都非常之大。過左唔知幾耐，我總於抖順條氣，頭腦又開始清醒，於事坐起身望住呀方。

呀方既表情依然非常痛苦，身體上面既疤痕完全無消退。另一方面，小明訓著左。

諗番轉頭，我竟然連頭先果場戰鬥既意義都唔知道。

二章四節 潛入 完 待續